



ZUBELDIA ARANBURU familia

DANAK BAT kale-etxea da. Herrian bertan dago, udaletxe eta elizatik oso gertu; Amundarain erreka-ertzean.

Inguruko langile eta ofizialak maisu zirela, eta aita-semeak peontzan, altxatu zuten etxea, 1972an. Horretarako, Fabrika Handian lanean ari ziren semeek ere etxea egin ahal izateko baimena hartu zuten eta seme-alabekin batera denak elkarrekin bizitzeko moduko etxea egin zuten, aurrean baratztea zuela. Familiak egin etxea eta familiak erabaki zuen izena: *Danak bat*.

Gaintzako Inazio Zubeldia, *Elosegi* baserrikoa, eta Karmen Aranburu, bera ere gaintzatarra eta *Eizmendi* baserriko alaba, 1947an ezkondu ziren Gaintzan. Otordua *Eizmendi* baserriko ganbaran egin zuten eta ezkontza-bidaian Iruñea eta Zaragoza bisitatu zituzten. Inazio eta Karmen Zaldibin jarri ziren bizi izaten, *Olaño* etxean.

Umetan, Inazio eta Karmen Gaintzako eskolan ikasiak ziren. Karmenek hamarren bat minutu zituen baserritik eskolara eta Inaziok, berriz, hiru ordu laurden. Osabak hamaika urterekin eraman zuen Karmen Donostiara neskame, eta han lau edo bost ume zaintzen omen zituen. Donostiako familia hartan urtebete egin zuen, etxera etorri, eta berriz itzuli zen Donostiara. Baina handik berriz etxera ekarri zuten etxeko lanak egitera. Inazio, berriz, bederatzi urterekin eraman zuten morroi beste baserri batera.

Inaziok 1945etik aurrera Fabrika Handian egin zuen lana, eta bertara bizikletan joan ohi zen. Amak baserriko lanei jarraitzen zien. Hiru behi, bost txerri eta untxiak eta oiloak gobernatzen zituen eta baratzean denetik egiten zuen. Ordiziako feriara ere eramaten zituen arrautzak. Baserritik Zaldibiraino hogeita minutuko bidea zuen oinez.

Inaziok eta Karmenek bost seme-alaba izan zituzten: Joan Enrike, Luix Mari, Maria Jexux, Miel Mari eta Joxe Joakin. Zaldibin bizi dira denak.

Ama Karmen bixkor-bixkor dabil oraindik, ehun urteren mugan.

Informazio emaila:
Maria Jexux Zubeldia



Inazio Zubeldia (aita) eta Karmen Aranburu (ama).



Joan Enrike, Karmen Aranburu (ama),
Inazio Zubeldia (aita) / Miel Mari, Maria
Jexux, Joxe Joakin eta Luix Mari (1960).



Luix Mari Zubeldia, Karmen (ama), Inazio (aita), Joanita Aierbe, Joan Enrike Zubeldia, Benigna Iruariz, Fermin Aierbe /
Miel Mari Zubeldia, Joxe Joakin Zubeldia, Jose Inazio Aierbe, Eugenio Aierbe, Maria Jexux Zubeldia/ Iker Aierbe.